

Ko te wai-ora o koutou tupuna, ko te matohu, i te rangirua, i te whati o te waiata, i te korapa ranei o te tohu tana, ko te hautu i te rite kia rite e whai ake nei:—

1. *E te ihu, e waenga takoto atu!*

Rite! kia rite!

Aue i te kaha ko te rite!

Rite! pehia!

2. *Waeae takahia! ringa pakia!*

Rite! kia rite!

Pona hopukia! Turi whatia!

Wiri! kia wiri!

E te whanau, maranga ki runga, kua hahae mai te ata. Rauawatia a Takitimu, ka mimita kia maru. ka toro ki te moana.

Tou kai-hautu, ko Aotearoa, ko te Pihopa Maori, ko te mana i tukua iho ki nga tohunga pono o nga whakahekenga iho, i tumanakitia e o koutou matua.

Kaati noa te pangapanga kohatu tetahi ki tetahi, kei taha; a koutou, ka pa ke ki te Atua, a, ka mate te whakapono. Ko ia hoki tenei te taonga e kiiia ake nei e o koutou matua, kia mau ki tewhakapono hei matua mo koutou. He kupu manaaki, he hua no te whakapono. Kua e takahia, kei tahuri ake, a, ka ngau.

Puripuri o koutou ringa, tetahi ki tetahi. Awhiawhi ki nga pakihiwi tetahi ki tetahi. E hoki te aroha ki te matua, ki te ū kaipo.

TE POOTI MEMA.

Kua whakaatu te Pirimia ko te ra hei poositanga i nga mema Paremata hei te Wenerei te 11 o nga ra o noema. Kaore ano he kupu mo te ra pooti o nga mema Maori.

NGA MEMA MAORI.

I te mea kua mutu te Paremata, ka titiro whakamuri te Toa Takitini ki nga hau o nga whakahaere a nga mema Maori o te toru tau ka huri nei.

E te iwi, he aha te mate i puta mai ki a tatou i nga mahi a o tatou Mema?

Kaore he whakahoki mo tenei patai, no te mea kaore rawa tatou i mate i o tatou mema.

Kaati, he aha te ora i puta ki te iwi i runga i nga whakahaere a o tatou mema?

Mehemea ki te ata whakararangitia nga kaupapa o te ora, kaore e whai wahi Te Toa Takitini mo etahi atu korero.